

大寶積經

第五十

七十七
鳥十

47558

10



元祿九年丙子二月日重脩

皇圖永固 帝階綴昌

佛日增輝 機輪常轉

山城州天安寺法金剛院置



大寶積經卷第五十

大唐三藏法師 玄奘奉 詔譯

菩薩藏會第十二之十六

靜慮波羅蜜多品第十之二



復次舍利子菩薩摩訶薩修行靜慮波羅蜜
多故獲得如是無退神通善能建立智所作
業舍利子當知菩薩摩訶薩得是通智由清
淨心鮮白心明潔心無濁心離隨煩惱心善
調順心善寂靜心善修治心如是心相之所
由生靜慮解脫三摩地三摩鉢底之所發起
舍利子是菩薩摩訶薩處於世界故作意生
非繫縛生不由繫縛命終受生何以故是善

薩摩訶薩解脫一切虛妄分別故解脫一切
非真實煩惱縛故解脫一切顛倒妄執所依
止故是故此菩薩摩訶薩隨現世界解脫而
生解脫命終解脫受生舍利子是菩薩摩訶
薩現受生已成辦大乘圓滿一切諸佛正教
遍遊十方廣求佛法雖志有所求而無取無
得隨入諸佛法即為一切法隨入一切法即
為諸佛法如是菩薩隨入佛法及一切法然
不隨彼法非法行舍利子諸菩薩摩訶薩若
能如實求諸法時安住無取及無得者是則
無有一法而可入於筭數何以故一切諸法
超過筭數道故若能了達法平等性是則不

執法與非法何以故一切諸法性無執故若
計於中而有義者是則獲得廣大無義若有
善能不計於義是則義與非義不現前故不
見義者於一切處覺慧無礙是菩薩摩訶薩
若能如是了覺無礙則為獲得無障礙覺若
有無障礙覺則於一切而無所著若無所著
則無所任若無所任則無所乏若無所乏則
無礙無求若無礙無求則無迷無惑若無迷
無惑則無我所若無我所則無攝受若無攝
受則無所執若無所執則無諍論若無諍論
是則無諍沙門之法若有無諍沙門法者是
則一切無礙無障等虛空求若能等彼虛空

求者則不繫屬欲界色界及無色界若於諸
處無繫屬者則無色相及以形量若具無是
色相形量則能如是隨覺若能如是隨覺則
能如是通達舍利子云何說名隨覺通達舍
利子菩薩摩訶薩若能隨覺通達是處無有
少法可得此則說名隨覺通達舍利子諸菩
薩摩訶薩由平等證入如是隨覺通達故說
是菩薩摩訶薩依靜慮波羅蜜多成就希奇
未曾有法復次舍利子云何名爲菩薩摩訶
薩成就希奇未曾有法舍利子菩薩摩訶薩
依靜慮波羅蜜多故雖行大慈而恒觀無我
雖行大悲而知無衆生雖行大喜而知無命

者雖行大捨而知無數取雖廣行大施而心
恒調順雖緣境淨戒而心常寂靜雖隨辱行
忍而心無窮緊雖勤加精進而心能簡集雖
入諸靜慮而正心觀察雖遍行智慧而心無
所行雖行四念住而心無緣念亦無作意雖
行四正斷而心無生滅雖行如意足而心無
戲論雖行淨信而心無繫著雖行正勤而心
恒遠離雖行於念而心恒自在雖住三摩地
而心證平等雖行般羅若而心本無相雖行
諸力而心無摧伏雖行覺分而解析菩提雖
修道分而心無所修雖行奢摩他而心恒寂
滅雖行毗鉢舍那而心無定觀雖修行聖諦

而畢竟遍知雖成熟衆生而心本清淨雖攝
受正法而不壞法性雖淨佛國土而心等虛
空雖證無生法而心無所得雖行不退轉地
而心性無退雖獲諸妙相而知性無相雖莊
嚴道場而心遊三界常處周輪雖降伏魔軍
而於諸含識無所摧伏雖知諸法即菩提性
而心隨覺了雖轉法輪而心任法性無還無
轉雖復示現大般涅槃而於生死性心常平
等如是舍利子是名菩薩摩訶薩平等證入
隨覺通達如是希奇未曾有法當知修行靜
慮波羅蜜多之所成就復次舍利子何等名
為菩薩摩訶薩依靜慮波羅蜜多修學菩薩

靜慮之相舍利子菩薩靜慮不住自性為滿
如是三摩地故菩薩靜慮無有愛味不為貪
著自安樂故菩薩靜慮緣於大悲為斷一切眾
煩惱故菩薩靜慮定不退轉緣於欲性增上
性故菩薩靜慮發發神通了達眾生諸心行
故菩薩靜慮心欣愛悅善能顯發心自在故
菩薩靜慮了知一切三摩鉢底映蔽一切色
無色界故菩薩靜慮是為寂靜最勝寂靜近
於寂靜映蔽聲聞獨覺見定故菩薩靜慮無有
分別極為究滿妙清淨故菩薩靜慮行品最
勝習氣相續永除滅故菩薩靜慮以慧超度
超度一切諸世間故菩薩靜慮為諸含生欲
解導首善能度脫諸含生故菩薩靜慮紹三
寶種令不斷絕又佛靜慮無窮蓋故菩薩靜

解導首善能度脫諸含生故菩薩靜慮紹三
寶種令不斷絕以佛靜慮無窮盡故菩薩靜
慮最爲高顯三摩呬多常現前故菩薩靜慮
自在而轉諸有所作善圓滿故菩薩靜慮是
爲大我以妙智慧爲大我故舍利子如是無
量菩薩靜慮皆是菩薩摩訶薩依靜慮波羅

蜜多之所集起復次舍利子菩薩摩訶薩靜
慮波羅蜜多何等之法而爲前導舍利子靜
慮波羅蜜多者心靜觀智以爲前導心任一
緣以爲前導心無散動以爲前導其心安任
以爲前導心奢摩他以爲前導心三摩地以
爲前導三摩地根以爲前導三摩地力以爲

前導三摩地覺分以為前導正三摩地以為
前導靜慮解脫以為前導九次第定以為前
導九滅除法以為前導一切善法以為前導
伏煩惱怨以為前導三摩地蘊具足圓滿以
為前導菩薩摩訶薩諸三摩地以為前導佛
薄伽梵諸三摩地以為前導舍利子如是等
無量靜慮皆為靜慮波羅蜜多前導之法舍
利子復有無量無邊證寂靜法並是靜慮波
羅蜜多之所前導舍利子是名菩薩摩訶薩
靜慮波羅蜜多菩薩摩訶薩為阿耨多羅三
藐三菩提故當於是中發勤精進具足修學
行菩薩行介時世尊欲重宣此義而說頌曰

靜慮解脫到彼岸
其心清淨無濁穢
有大靜定名遍照
又名月光淨莊嚴
或名高行或心勇
或戒德辨或無憂
或各法炬或法勇
或正法智自然超
或名觀察他心定
復名滅惑嚴勝幢
或名斷疑及無著
或力高勝或十力

勤行此行多劫海
不染世法喻蓮花
此定依修到彼岸
復名電光所嚴飾
或定名為無垢光
或名諸法自在轉
或名山威法自在
或持正法妙清淨
或名正法寶光明
有定名為摧魔力
或定名為寂靜燈
或名敬手大名稱

或名持山善安住
或名無勝勝彼勝
或無邊智或自在
或名月淨日音聲
或善調龍師子吼
或名旋轉或返還
或定名為念諸佛
或名智轉或入空
或金剛喻或靜地
或名山王或不瞋
或離煩惱或觀察
或發廣大諸功德

或蘇迷盧大明燈
或名智炬及慧行
或名發慧寂靜定
或那羅延摧憍慢
或名遠離種種想
或無瞋眼力清淨
或名念法或念僧
或名無相或無願
或金剛地或高勝
或無邊轉或淨音
或虛空妙或如空
或趣覺慧或念慧

或辯無盡或相續

或無壞善作所作

或名慈現或悲廣

或捨或脫二種礙

或金剛幢或智海

或名智炬無動定

或簡集法或無動

或無邊光或佛海

或名如來妙莊嚴

或名歡喜莊嚴土

有定名為一切時

或定名為到彼岸

或無邊說詞無盡

或名觀察或眾悅

或入歡喜或欣慶

或名法光或法義

或解脫堅或眾喜

或定名曰勝蓮花

或名慧上及寂靜

或名解脫或智授

或名無邊勝光焰

或名悅豫眾生意

順菩提道三摩地

覺分花嚴施寶鬘

或施甘露聖解脫
或名海潮溝寶藏
或名神通廣大義
或定名為大通照
證得如斯寂靜定
修行靜慮到彼岸
行住恒遊靜慮境
若坐若卧止定中
處定能發大音聲
無異分別無自在
如是及餘無涯際
聰睿菩薩愍舍靈

或風無動盛光明
諸那羅延山峯力
妙善攝受三摩地
諸佛如來之境界
及餘拘胝無有邊
菩薩功德廣無量
其心無擾常憺怕
無有威儀不在定
以諸法性恒寂靜
無我無命無分別
無有數量功德海
修行靜慮到彼岸

般若波羅蜜多品第十一之一

復次舍利子云何菩薩摩訶薩般若波羅蜜
多菩薩摩訶薩為阿耨多羅三藐三菩提故
依此勤修行菩薩行舍利子菩薩行般若波
羅蜜多故於菩薩藏微妙法門懇懃鄭重聽
聞受持若讀若誦思擇義理既能通達復為
他人廣宣敷演開示其要舍利子若有菩薩
摩訶薩聞我說已如法奉行於菩薩藏微妙
法門懇懃鄭重聽聞受持讀誦研尋通達其
義為他宣說廣開示已當知是人證得如是
無盡慧相舍利子如是慧者為何等相云何
入證舍利子所言慧者以聞為相菩薩之人

如理證入是故說為無盡慧相又舍利子如是之相我當廣說謂此相者菩薩摩訶薩為求正法欲樂為相欲解為相方便為相善友為相無慢為相於多聞所恭敬為相尊重為相旋遶為相謙敬為相親覲為相諦聞為相承事為相思惟為相不亂為相珍寶想為相良藥想為相息諸病想為相念器為相趣覺為相樂大慧為相證入覺為相聞無猷足為相捨增益為相調順離薪為相親近多聞者為相於諸作事喜愛為相身調適為相心勇銳為相又舍利子菩薩摩訶薩於聽法眾無倦聽聞為相聽聞正法為相

聽聞正行為相聽聞證智為相聽聞波羅蜜
多為相聽聞菩薩藏法為相聽聞諸攝法為
相聽聞方便善巧為相聽聞梵住為相聽聞
神通為相聽聞正念正智為相聽聞念住為
相聽聞正勝為相聽聞神足為相聽聞緣起
為相聽聞無常為相聽聞苦法為相聽聞無
我為相聽聞寂靜為相聽聞空為相聽聞無
相為相聽聞無願為相聽聞無加行為相聽
聞善根加行為相又舍利子如是自在為相
聞法為相對治雜染為相制伏一切煩惱想
為相讚美智者為相親覲聖者為相遠離非
聖為相聽聞聖者為相聽聞諸根為相聽聞

修習隨念為相聽聞覺分為相聽聞聖八支
道為相聽聞如來力無所畏大慈大悲大喜
大捨無礙辯才十八不共佛法為相如是舍
利子當知菩薩摩訶薩若於此聽聞即於此
解了若於此解了即於此正行何以故舍利
子若菩薩摩訶薩於菩薩藏微妙法門聞相
趣入方便無量吾今略說四十一種舍利子
何等為相一者若有菩薩於此法門生欲樂
者當知此菩薩摩訶薩即為聽聞聞便解了
既解了已便行正行者若菩薩於此法門生
於欲解當知此人即是聽聞解了行於正行
三者若有菩薩於此法門方便趣入當知此

人即是聽聞解了行於正行四者若有菩薩
親近善友此人即為聽聞解了行於正行五
者若有菩薩於多聞所心無有慢此人即為
聽聞解了行於正行六者若有菩薩恭敬多
聞此人即為聽聞解了行於正行七者若有
菩薩於多聞者生尊重心此人即為聽聞解
了行於正行八者若有菩薩於多聞所旋遠
奉敬此人即為聽聞解了行於正行九者若
有菩薩於多聞所行謙下心此人即為聽聞
解了行於正行十者若有菩薩親近多聞此
人即為聽聞解了行於正行十一若有菩薩
於多聞所攝耳諦聽此人即為聽聞解了行

於正行十二若有菩薩於多聞所承事迎逆
此人即為聽聞解了行於正行十三若有菩
薩於多聞所思惟義趣心定不乱此人即為
聽聞解了行於正行十四若有菩薩於多聞
所起珍寶想此人即為聽聞解了行於正行
十五若有菩薩於多聞所起良藥想此人即
為聽聞解了行於正行十六若有菩薩於多
聞所能起息滅貪瞋癡想此人則為聽聞解
了行於正行十七若有菩薩於多聞所聞已
能持此人則為聽聞解了行於正行十八若
有菩薩趣覺於法此人則為聽聞解了行於
正行十九若有菩薩於多聞所樂其智慧此

人則為聽聞解了行於正行二十若有菩薩
於多聞所聞已覺悟此人則為聽聞解了行
於正行二十一若有菩薩聞無厭足此人則
為聽聞解了行於正行二十二若有菩薩聞
說陀那便增長捨此人則為聽聞解了行於
正行二十三若有菩薩聞說尸羅便守護戒
此人則為聽聞解了行於正行二十四若有
菩薩聞說羼底便能修忍此人則為聽聞解
了行於正行二十五若有菩薩聞說毗利耶
便起正勤無倦精進此人則為聽聞解了行
於正行二十六若有菩薩聞說靜慮便入靜
慮其心不散此人則為聽聞解了行於正行

二十七若有菩薩聞說般羅若其心決定便
修智慧為盡諸漏此人則為聽聞解了行於
正行二十八若有菩薩於多聞所生大歡喜
此人則為聽聞解了行於正行二十九若有
菩薩聽聞法已身調適者此人則為聽聞解
了行於正行三十若有菩薩聽聞法已其心
勇銳此人則為聽聞解了行於正行三十一
若有菩薩聞大乘經心生信欲此人則為聽
聞解了行於正行三十二若有菩薩聞攝法
已其心趣入此人則為聽聞解了行於正行
三十三若有菩薩聞說念住便即趣於身受
心法此人則為聽聞解了行於正行三十四

若有菩薩聞說正勝便於惡法已生未生若
背若捨若彼善法已生未生不捨覺轉此人
則為聽聞解了行於正行三十五若有菩薩
聞說神足即能奉行生身輕性生心輕性生
欲輕性此人則為聽聞解了行於正行三十
六若有菩薩聞說靜慮便靜思惟其心趣入
此人則為聽聞解了行於正行二十七若有
菩薩聞諸法中不輕蔑行便於衆生起大慈
心於入苦者起大悲心於正法所起大喜心
於不善所起大捨心此人則為聽聞解了行
於正行三十八若有菩薩聞說根已其心趣
入於彼諸根所謂信根精進根念根慧根三

摩地根此人則為聽聞解了行於正行三十
九若有菩薩聞說覺分其心趣入覺悟法性
此人則為聽聞解了行於正行四十若有菩
薩聞說道支其心趣入涅槃正路此人則為
聽聞解了行於正行四十一若有菩薩聞說
如來力無所畏大慈大悲大喜大捨無礙辯

才十八不共佛法及餘無量諸佛正法皆聽
聞已其心趣入阿耨多羅三藐三菩提此人
如是如法聽聞既聽聞口便能解了既解了
已行於正行舍利子我已說是四十一法趣
入聞相諸菩薩摩訶薩當於中學舍利子如
是名為菩薩摩訶薩修行般若波羅蜜多聞

慧本相復次舍利子菩薩摩訶薩修行般若
波羅蜜多行菩薩行者應於如是大菩薩藏
微妙法門鄭重聽聞受持讀誦思惟其義通
微妙法復為他人廣分別說是行資糧舍利
子云何菩薩摩訶薩於如是法而起正行舍
利子菩薩於法起正行者所謂如說修行建
立而住是名於法而起正行若復有能一切
不取是名於法而起正行何以故舍利子若
取於法即名邪行無處無位執取法人由如
是法能得出離必無是處何以故無取行人
於法無行尚應生疑無作用故況取法行而
非邪行是故應當不取諸法而行正行又舍

利子若於諸法無有障礙是名正行若於諸法不輕蔑者是名正行若於諸法不取不捨不生不滅是名正行乃至若於諸法無合無散是名正行又舍利子如我所說若有是處無有少法而可見聞亦無可說如是一切諸法非可得見非可執取何以故一切諸法皆是一相所謂無相又舍利子一切諸法性本無相若有菩薩說於無相是則無相還應可說何以故無相有相皆無相故不可說言此為有相此為無相舍利子若有菩薩摩訶薩能悟如是一切法相即是無相不可得見不可執取如法了知是名正行菩薩摩訶薩勤

修如是正法行已當於諸法證入無障照明
之慧如是舍利子是名菩薩摩訶薩般若波
羅蜜多正行之相尔時世尊欲重宣此義而
說頌曰

安住正行聰睿者
此人於法不起執
證得諸法不為空
又非空法有所執
於法無取亦無捨
無取是名諸法相
若於諸法智無礙
於焚燒智無所執

於菩薩藏善決定
無執取行相如是
非於諸法空平等
無執正行相如是
亦非取法以為法
無取正行相如是
此智無有不焚燒
諸法正行相如是

智者安住遠離德
若能依止軌則行
是清淨門通諸法
智者雖知無所觀
於甚深法了勝義
踊現無邊功德行
於彼所說諸文義
以彼文義俱無邊

於法應起勤精進
亦時當入清淨門
亦了有情諸欲解
而能演宣如是法
常於深義勝決擇
明智多聞如大海
究竟無能證得者
真實正行恒無動

復次舍利子菩薩摩訶薩修行般若波羅蜜
多時於菩薩藏微妙法門殷重聽聞乃至為
他如法說已當知是菩薩摩訶薩於一切法
獲得光明能破一切無明黑闇及諸翳膜舍

利子如是光明即為智慧何以故善不善法
皆能明了如實知故是菩薩摩訶薩修如是
法獲明慧已乃至命難眾苦因緣決定不造
諸不善法舍利子是菩薩摩訶薩為欲永滅
不善法故隨所聞法極善通達既通達已是
則說為牟尼寂靜如是舍利子是名菩薩摩

訶薩修行般若波羅蜜多時正行之相尔時
世尊欲重宣此義而說頌曰

如人入闇室

覆蔽絕光明

雖有眾色像

非明眼所見

如是隨有人

內具諸明解

不聞於正法

善惡何能曉

多聞解了法

多聞不造惡

多聞捨無義

多聞得涅槃

善聽增長聞 聞能增長慧 慧能修淨義

得義能招樂 聰慧得義已 證現法涅槃

淨覺法相應 證得第一樂 聞菩薩藏已

正法善安住 為世大光明 行菩提妙行

復次舍利子菩薩摩訶薩為欲修行般若波

羅蜜多故於能受持菩薩藏經正行人所深

起敬心善知識想既生想已又於大菩薩藏

微妙法門倍復尋求令此法門轉增明淨舍

利子是善菩薩摩訶薩為求菩薩藏故發生信

欲策勵正勤檢攝其心令定安住是菩薩摩

訶薩於四正斷方便修成一切法中得無障礙

如是舍利子是名善菩薩摩訶薩般若波羅蜜多

正行之相介時世尊欲重宣此義而說頌曰
所謂說法者 即為善知識 恭敬聽聞法
安任於正行 欲解常無退 精進常高勇
淨慧常修治 於智常安任 自然達諸法
不隨於信行 以智觀於法 是為諸佛說
智者分別句 趣義善加學 於白黑品等
常修常遠離 心曾無厭倦 於法無退沒
身欲並輕安 速得心精進 由聞法增智
智增無退念 智恒依念任 了知淨穢法
學於無上法 勝趣念慧力 了衆生欲解
自學於長夜 學法已昇進 極進智清淨
了衆生欲解 如解便開示

復次舍利子菩薩摩訶薩修行般若波羅蜜
多時於菩薩藏微妙法門如是尋求通達覺
慧依是清淨善法明門菩薩常應如是修學
舍利子若有菩薩摩訶薩於法修學應作是
念二因二緣能發正見何等爲二所謂從他
聞音及以內自如理作意彼復思惟從他聞
音如理作意爲何等相尋重思惟若有樂定
修相應行諸菩薩等未曾聽聞大菩薩藏微
妙法門又不聽聞聖法律教但於三摩地中
生知足想當知是人以慢力故起增上慢我
說是人不能解脫生老病死愁歎憂苦諸熱
惱等既不脫諸熱惱等苦豈得脫彼五門生

死為之沉溺流轉不息是諸眾生成實非解脫
而便自謂我已解脫實未離苦而便自謂出
離眾苦是故如來依是人故如實說法若能
從他隨順聽聞是則解脫諸老死等復作是
言如我先聞薄伽梵說

多聞解了法

多聞不造惡

多聞捨無義

多聞得涅槃

善聽增長聞

聞能增長慧

慧能修淨義

得義能招樂

聰慧得義已

證現法涅槃

聞法淨點慧

證得第一樂

是故舍利子諸菩薩摩訶薩如是思已當於
大菩薩藏微妙法門及以聖法毗奈耶教般
重聽聞受持讀誦廣為他人敷演開示復次

舍利子若諸含識於菩薩藏微妙法門雖復
聽聞而不如理方便作意當知是人於彼聖
道不能正行是故如來依是人故說正法要
作如是言若欲解脫生老病死當具內自如
理思惟諸菩薩等應如是學舍利子云何名
為如理方便何等菩薩如理作意而能修學

舍利子菩薩摩訶薩如理方便者無有一法
若合若離何以故如理方便非方便故又舍
利子菩薩摩訶薩若有安住如理方便及作
意者當知此相但是音聲而此音聲性無所
起亦不轉起及由彼故而發音聲何以故彼
一切皆不可得故又復菩薩觀是音聲前際

後際從何而生滅往何所如是觀察了不可
得又更推求如此聲者爲在已說爲在今說
爲在當說又重推求如是聲者若已所說若
今所說若當所說如是聲者若爲斷故已說
若爲斷故今說若爲斷故當說如是聲者若
爲證故已說若爲證故今說若爲證故當說
是菩薩如是一切尋求聲已都無得者又更
觀察若過去相若未來相若現在相如是觀
已皆不可得舍利子若菩薩摩訶薩如是正
觀察時是名如理方便作意是故如理方便
菩薩摩訶薩於如是觀應具修學復次舍利
子云何菩薩摩訶薩如理觀耶諸菩薩等云

何應學舍利子是菩薩摩訶薩觀一切法自
性息滅若如是觀名如理觀若觀諸法自性
寂靜是則名為如理正觀若觀諸法畢竟空
寂是則名為如理正觀若觀諸法入平等性
是則名為如理正觀若觀諸法畢竟無生是
則名為如理正觀若觀諸法畢竟不生是則
名為如理正觀若觀諸法畢竟不起是則名
為如理正觀若觀諸法畢竟寂滅是則名為
如理正觀舍利子是菩薩摩訶薩作是觀時
亦不見有能觀之者應如是觀所謂非觀非
不觀故若有菩薩作是觀者名如理觀若他
觀者名非理觀復次舍利子云何菩薩摩訶

菩薩應學如是如理方便舍利子菩薩摩訶薩
如理方便者非於少法有愚迷故如理方便
者非於少法而生障礙如理方便者無有少法
非解脫門如理方便者無有為斷少分法故
發勤精進如理方便者不為證少法故勇勵
正勤舍利子菩薩摩訶薩應以如是如理正
見如其所見正觀諸法舍利子云何名為如
其所見正觀諸法舍利子謂無所見名觀諸
法何等是為無所見耶舍利子無所見者名
為無生言無生者是為無起言無起者名無
所照是故如來依是正法說如是言若有菩
薩觀一切行見無生時即是趣入正性決定

夫正見者謂能趣入正性決定舍利子彼
菩薩摩訶薩作是思惟何因緣故當得趣入
正性決定舍利子菩薩摩訶薩應如是學若
觀我見為平等者即是一切諸法平等若作
是觀當知趣入正性決定是故諸菩薩摩訶
薩若欲趣入正性決定者當於如是大菩薩
藏微妙法門殷重聽聞受持讀誦研窮義趣
復應為他如法廣說便當於是法門如理方
便作意修學舍利子如是名為菩薩摩訶薩
為阿耨多羅三藐三菩提故修行般若波羅
蜜多行菩薩行

大寶積經卷第五十


鳥

鳥

鑿紆定及 曠日上音 舜溝及古侯 憺怕上徒敢

陌及下利也 銳及下利也 黠慧上閑八及 熹盜勅敬 太

隊



猪飼順長壽附

